

ITLF BULLETIN

A Publication of ITLF Media & Publicity Department

VOLUME I-ISSUE NO 29

INDIGENOUS TRIBAL LEADERS' FORUM

TUESDAY 11 JULY 2023

Kangchup Geljang meilhei le sepai kikap

Pathienni jaan pung 9:00 PM vel'a pat 5:30 AM geiyin Kangchup Geljang ah kikaptuona ana um'e. Meilheite'n khosung ahin nailut phat uva amun'a um sepaiho toh kikaptuona ana um ahin, bomb gei mangcha in kikaptuona aum in, meilhei lam'a pat mikhat athi'e tithu akimui. Meilhei news ho'n Kuki militants ho'n Phayeng attack abawlina uva mi khat athat uve ti'n thuso abawl uve. Kangchup Geljang ahung buluna uva sepaiho'n akaplih'u ahijoi. Thulhut kimu chun aseina'ah meilhei thingnuoi 7 athi'e ti thulhut aum'e.

Kwakta a Protest um

Manipur gamsung boina jeh'a Kuki le Meilhei kikh'a cheng Pangalho'n boina le hahsatna atuo zing naban uva Meilheite'n anop phat phat'u leh Kukite napanpi uve ti'a anokhum zing'u demna in Sit in Protest July nisim 10 nichun Kwakta Bazar lai'ah kiphinna anabawl uve. Tuchung boina'a Meilheite kithuopi ding'a hunam'a nokhum'a aumji'u zong phamo asathu'u aphuongdoh uve. Meilhei media ho'n Pangalho Meilheite toh apangkhum ahitai ti'a aphuondoh'u zong demna anei uvin, panpitum neilou'a chamna ding boipi'a panla zing Pangal Community hi koima'n mumal umlou hiel'a asuhbuoi tahlou ding in zong Meetei Pangal Intellectual Forum in phuondohna anei uve. Chule khamna thei toh kisaiya Pangal community ngohna Meilheite'n aneizing'u zong abawl tahlou ding uvin aseu uvin, drug lord zouse phaituol sung'a cheng suohkei ahivuvin, Pangalho suhminsietna ding'a lunggel umho haisan ding in zong tepna anei uve.

Meilheite latest war tactic: FIR

May nisim 3 akuon'a Manipur gamsung'a gaal le tuol ahung piendoh toh kilhon in kitha kimat nitin in asuoh zing in, meithal mangcha'a kidouna bou hitalou in meilheite'n tuthah in kidouna jatchuom beh ahin pandoh tauvin ahi. Eimite'a ding'a hangsantah'a thudih phuondohho chung'ah FIR ahin bawl pan uvin, Karan Thapar in The Wire a ding'a interview ana bawl WL Hangsing le Mary Zou chung'ah FIR ana bawl masapen uvin ahi. Aban in tuchung boina'a eimilah'a ding'a scholar challengen Prof. Khamkhansuan Hausing, HoD Pol. Sc. Univ. of Hyderabad zong case abawl khum uve. Aban in ZSF le KSO in tuchung boina'a

Manipur Government panlahna phuondohna ding'a ana suodoh The Inevitable Split zong ban abawl uvin, Publisher ho zong gotna pieh ding ti'n case abawlkit tauve. Chule National Federation of Indian Women in representative ahinsol mithum in report abawlina uva tuchung boina hi State Sponsored ahi ti phuondohna ananei jehu vin ahung kalsuongho chung'a zong FIR abawl uve. Meilheite'n ahamdoh apaodohho khat-khat'a suhthip ding tohguon aneizing'u ahin, hiche hi ipiti pan i-lah uva i-ki maituopidi'u ham ti lunggiltah'a gel'a panlah ding dan kisiem angaitai. Hetding khat chu, achiesa June lha'a zong chun ITLF Media Cell Twitter account zong eina block pieh'u ahitai. Hamdoh theilou ding'a i-kam'u ahuh'u hi freedom of speech eiki lahpiehna'u khat zong ahi.

Delhi a Pastor kiloikhomho'n taokhomna neidi

Tuni July nisim 11, nilhah nidan 4-6 sung'a Delhi mun'a Kuki-Zo Pastorho'n taokhomna aneidi'u ahi. Kuki-Zo chate sung'a kipumkhatna tuhchah ahizing nading'a taokhomna hi Rev. Chinkhangen le Rev. Kapkhanmung Shoute in alamkai lhon ding, Joint Worship Team in vahchoina le thangvahna alamkaidi'u ahi.

Khamenlok lhang'a mipi hahsatna sang

Ukhrul lhang'a um khuo phabep akihallhah zou nung in mipi'n khosung dalha'n jamna thei thei ana bel tauvin ahi. Kingahna ding nei mi phabep in Saikul, Kangpokpi, Lamka chule mundang dang ana juondoh zong leh belding neilou'a alhang'a umden mi 300 val aum nalaiyin, amaho hi Pasong, Dongsum, Songmun, Songphal, Molnom, chule adang dang'ah akithe thang uvin, alhunna'u houbungho vetkolna in Hou-inn mun'ah camp siem pieh ahivu. Houbung in houbung chang aneiho uvin akitoudel uvin, relief material deibang in alhung thei puon, adehset in damtheina ding'a ngaichat lou-le-ai lam'ah hahsatna sangtah atuo'u ahida'n relief camp vekol a pangho akuon in thulhut akimu'e.

Axis Bank kibulu

New Bazar a um Axis Bank chu loot ahidan janni chun hetdoh ahi. Sum le sana 1.3 Cr tobang guhmang anahi. Meilhei staff ngen ahitoh lhon'a apohdoh'u ahiding ginmo ahi.

EDITORIAL

May nisim 3 akuon'a boina ahung photlot changtah'a ahung kipatdoh phat in i-gellou lambeh uvin ikihei uvin, gancha tha'a eihin tha uva, inn-le-lou eihin lhah pieh phat uvin chungleng vacha bang in bitjohna ding mun hol in i-lubuh'u ina jampi tauve. I-thusim uva hiche thilsuohhi suhmilni umlou ding ahitai. Kum tamtah ina chengkomp'i'u Meilheite'n kiging manlou hiel'a tha chimit ding'a eihin luonvuh uva, suhmang ding'a eihin nokhum'u hin Manipur sung'ah chenmun nanei pouve ti lung'a agelzing'u tahsuona khat ahung hita'n ahi.

Akipat akuon in tuni geiyin bitjohna ding mun i-ngaituo zing nalai uvin, gamgi chinho'ah Meilheite apat'a kihuhhing theina ding in bunker ikisiem uvin, meithal-meichang i-neikham kham uvin pasal hangsanho'n nam khankhuo ding gelna jal in hinna tuohdoh leu in pan alazing uve. Meilheite'n eihung kapjeh uva gamgi chin'a ahinna tuohdohho zouse jaana salaam i-peuve.

Meilheite meithal, meichang, chule lungthim'ah eiho phung-le-chang, ham-le-pao, tribe khentum umlou ahiti hezing pum'a tuchung gaal i-dou'u hi kengkhat'a dingkhom'a i-dou zingdi'u eiho'a ding'a sochatna thuguh hiding ahi. Hiche hi lung in geldoh zing utin, thisan luongho, inn-le-lou kihallhaho, eiho maban ding gelna'a ahinna ana tuohdohho lungthim'a geldoh zing pum in iki pumkhatna'u suse thei ding eima nomenclature, tribe, ham-le-pao, phung-le-chang thu boipilou'a, lungkhat le thakhat tah'a pan i-lahkhom zingdi'u iki deisah tinten uve.

Chung mang Pathien in Kuki-Zo chate phatthei ei-buoh'u henlang, i-zotna'u gam i-lhun kahse uvin eihin lhonpi zing tauhen!

- ✓ ITLF Media Cell staff hohin pressure sangtah neipum'a natoh aneizing ahijeh in mipi'n iki thuopi theina ding pen'u chu a natoh'u le alungthim ngaituona'u suhbuoi louding hi ikithuopina'u hiding ahi. Hiche toh kilhon in Media toh kimat'a natohding khoh tin-ten ahilou leh Media Cell office a houlim ding'a ga valut hin amaho natoh asuhbuoidi ahijeh in mipi lam in hethiem ding in ikitiem uve.
- ✓ ZORO makaina'a jing nikhuo leh Aizawl le

Kolasib mun'a kiphinna umding ahi. Amaho hin India PM Modi, Manipur CM N. Biren, chule Langza mun'a David Thiek lutan piehpa Mairembam Romesh Mangan lim hallhahna aneidi'u ahi.

- ✓ Meilhei singer Tapta in laa thah ahin release a chun kihouna le chamna kisiem zong leh Kukite tha chimit hithou thou ding ahi ti'n laa anasiem'e.

UPDATE TILL 11 JULY 2023



113
CONFIRMED DEATHS



197
VILLAGES BURNED



7000+
HOUSES BURNED



359
CHURCHES BURNED



41425
DISPLACED PERSONS



204
RELIEF CAMPS

RELIEF SUPPORT

Office: Lamka Govt College, Hiangtam Lamka

Contacts:

Mangcha Thangzom – 8837368373 (Convenor)

V. Gouthianmuan - 9862086583 (Co-Convenor)

FINANCIAL SUPPORT

Office: Lamka Govt College, Hiangtam Lamka

ITLF Joint Bank Account:

Name: Henkhopao Haokip & N. Vialkhanthang

Account No: 41912626404

IFSC: SBIN0064016 | Bank: SBI Salbung Branch